

## **Polota Pilipi sos dla yu ilimale hamili Pilipi**

### **Pilipi buka ya: dulu koko**

Mikadepe dle so Pilipi dla ha:ha:alota Polo watile namkale dle alisisi halopiyo. Epalati alotle Polota Loum mo dla amtuwale aya dulu dla polomama asiyama yu ilimale iye yia: watile hamiyo. Ya: yia: watile siyele yu atlemama molo atlale yu mate ilipo hamiyo. Polo ya:skamu ya:ye amtuwale aya dulu dla halema depo pomalamaiyo. Amasiyama ya: isikimi mikadepe dle sota Lod dulu dla me-sisiyele mate ha:ha:lepo depame yu iye ilipo hamiyo.

<sup>1</sup> Di Yesu Keliso oko halalo so Polo mate epo Timoti mate yu ilimale iye Pilipi mo dulu dla mikadepe dle so mate epo dikon so mate epame sos dokopala so mate dla hamima. <sup>2</sup> Epedeme di A God mate Lod Yesu Keliso mate yia:ta bokotiyapo malamale mate sadle mateta wua: dulu dla ellepe.

#### *Polota Pilipi so dla namkale dle yu atlale*

<sup>3</sup> Na: alila hapuloma wua: malapame God watile siyele yu atlemde. <sup>4</sup> Epame wua: yilo God watile inoma sumama siyele mate atlemde. <sup>5</sup> Adipalati, wua:ta ka:yapa God yu dalepame mikadepe duwa oloma etle pua dulu dla wua:ta na:ta ka:dle yu atlamsela:lati ka:pi gademduwapo. <sup>6</sup> Epapedeme na:malamana, Godta wua: dulu dla oko ka:dle

kotiyamuwaye pomellowa. Amasiyama Yesu Kelisota ma ilampuluwe dla tame gudepo mellepe.

<sup>7</sup> Epapele koko tle na:ta wua: yilo ipo sikemte malamhalaye ka:dena. Adipalati, wua:ye namkadulo ikadepepo. Ame adipalati, na:ta amtuwale aya dla tulluwe dla epame na:ta God tiyama tle halemama opata mikadepe dle dulu dla kokalepo ha:ha:lepo depame ka:dle yuye imsula:lati wua:tapo na: mate Godta bokotiyapo malamale dulu dla hatlope demduwapo. <sup>8</sup> God ya:malamana, na:ta wua: natilowedeme solotamale pato himme hala kokoye. Adipalati, na:tapo wua:ye Yesu Kelisota bokotiyapo malamale mate wua:ye sikemte malahalema.

*Polota inoma sumale*

<sup>9-10</sup> Na: wua: yilo inoma sumale yu pato himima, wua: dulu dla wua:tapo yimkadulo bokotiyapo malamolowe kokota ta:lepo depame, epame wua:tapo God koko malamoloweta sikemte ta:lepo depame. Epo na: ma inoma sumale yu hale himima, wua:tapo ka:dle koko mate batalimale koko mate dulu dla ka:dle koko tlo malanatipame halomha:ha:lepo depame. Epo wua:ta epamha:ha:mama Kelisota puale oloma dla ullu pa:talo so depo ha:ha:lepo depame. <sup>11</sup> Epame na: ma inoma sumale yu hale himima, wua:tapo Keliso tle ka:ka:dle koko halomoloweta wua: dla poposatilipo ha:ha:lati Godta natipo siyelepo depame.

*Polota amtuwale aya dulu dla haluwatapo ka:dle yuye opa dulu dla pato duwapo*

<sup>12</sup> Mikadepe dle so namkadulo, na: solotama, wua:tapo koko iye woloma malastlepo depame. Adipalati, na: dla woyamuwa wotiyalle koko-tapo ka:dle yuye poyumina. Amasiyama na: dla wowoyamuwa koko etapo ka:dle yuye opa hapuloma dla ma-hamtauwapo. <sup>13</sup> Epapedeme opa hapuloma hema ha:ha: so mate epo dokopala oplami aya alikili tle omha:ha:lalo so mate me-yia:malamana, na:ta Keliso dla mikadepe duwa koko tle amtuwale aya dulu dla halaye. <sup>14</sup> Epame na: dla oli dea yulupo hala koko itapo mikadepe dle so opi dla itiyamale hamipo, yia:tapo God yuye wowota:le pa:po atlamsiyamelepo depame.

<sup>15</sup> Mikadepe, opa opitapo na: dla elle himpame yia:ta God yu atlale koko tle na: tla:mtlowa depame God yu atlamsiyamapo. Amasiyama opa opitapo ka:dle malamale tle Keliso kokoye atlamsiyamapo. <sup>16</sup> Adipalati, yia:malamana, na:ta God tiyama tle halemama God yu yilo na:ta amtuwale aya dulu dla tuluwaye. Epapedeme yia:tapo na:ye bokotiyapo malapame God yu atlamsiyamapo. <sup>17</sup> Amasiyama opa opi anawolotapo yia:ta God yu atlale koko tle na: tla:mtlowa dlalo sotapo yia: ka:dle koko tle Keliso kokoye po-atlamsiyamasema. Amasiyama yia:yiskamu hamhetale koko tle Keliso kokoye atlamsiyamapo. Yia:ta epamsiyamama na:ta amtuwale aya dla hallati na: watile wotiyalle hamilowedeme amsiyamapo. <sup>18</sup> Epapele dulu dla opa opitapo batalipo malamale tle God yu atlamsiyamalati opa opitapo ka:dle momalamale tle Keliso kokoye atlamsiyamapo. Amasiyama epapele dulu dla na: koko e posesa:sema.

Adipalati, hatlo Keliso koko tlo opa dla atlowe kokota pato halapo. Epedeme ipapele koko dla na: sikemte siyema.

Epele dulu dla na: ma sikemte siyema. <sup>19</sup> Adipalati, wua:ta na: yilo inoma sumale koko tle epame Yesu ya: Hela:dle Sokota na: gademhala koko tle na:malamana, na:ye amtuwale aya dulu tle ma alikili dla woyamelepe. <sup>20</sup> Epedeme na: dupa dulu tle malapame solotamale kokoye ipo. Na:ta kokalepo halemama God oko wata hamhala iye pomellowa. Adipalati, na:ta na: okoye woloma pohalalo isikimi duka dla teyulupiye, eta na: dla wota:le hamilipe. Epapedeme na: solotama, na:ta ka:yapa wota:le pa:po itiyamale mate God oko dla sela:uwaye, ma wata epo hallowe solotama. Epapele dulu dla na:ta pasakalo hallowe dla epo polowe dla na: isikimi Keliso hi tlo di dla ta:dlowe solotama. <sup>21</sup> Adipalati, na:ta ala me-pasakalo hallepiye, na: isikimi Keliso yilo hallowepo. Amasiyama na:ta polowe ma ka:pi. Adipalati, edla na: Keliso mate hallepe. <sup>22</sup> Epapedeme na: ala me-pasakalo hallepiye, ka:dena, na: Lod okoye woloma hamtlowepo. Amasiyama na: dla malamale pta tatlama. Adipalati, na:ta malamaleye poloweta ka:pita:, o pasakalo hallowe kokota ka:pita:? dema. <sup>23</sup> Amasiyama na:tapo koko dapiyamte hema koko hatlo tlo solotamoloweye pta kokalema. Epele tlope na: popame Keliso mate hallowe tlo sikemte solotama. <sup>24</sup> Amasiyama na:ta wua: gadlowe yilo na:ta ala popolalo hallowe tlo ka:pi.

<sup>25</sup> Na: koko eye ikadepe demama malama, na:ye yipta popolowa, wua:tapo na:ta gadle tle

mikadepe dle dulu dla kokalepo ha:ha:mama sisiyele mate ha:ha:lepo depame. <sup>26</sup> Epapedeme na:ta ma wua: hala dla ilampulati wua:tapo Keliso dulu dla sikemte sisiyelepe.

<sup>27</sup> Epedeme koko patoye ipo, wua:ta ha:ha:le pasakalo dulu dla Keliso ya: ka:dle yu mate ala:po ha:ha:iya. Epele dulu dla na:ta puame wua: natilowe dla ta:, o isikimi na: mo dla halemama dallowe dla ta:, na: solotama, wua:tapo woloma malamale hatlope depame yimkata opa hapuloma mila:pi tle ka:dle yu dulu dla kokalepo ha:ha:lepo depame.

<sup>28</sup> Epele dulu dla wua: dla allimha:ha: so dla wowota:mha:ha:miya. Wua:ta powowota:lalo ha:ha:lepiye, eta yia:ta polowe dla umula taye yia: watle imelepe. Epame Godtapo wua: watle pasakalo hallowe hamilowedeme hala koko mape yia: watle imelepe. <sup>29</sup> Epedeme Godtapo wua:ye Keliso hala dla sisilamuwaye hatlo mikadepe dle dulu dla ha:ha:lepo depame po-apena. Hao, amasiyama Keliso yilo wotiyalle dulu dla ha:ha:lowe mate dla mape sisilamuwapo. <sup>30</sup> Epapedeme dita hapulomatapo yimkata kokalle koko dulu dla wotiyalle me-natimdepo. Epame wua: ma me-natiwapo, na:ta ka:yapa Keliso yilo wotiyalle hamama upiyele hauwaye. Epele dulu dla na: wotiyalle dulu edla ala mehalapo.

## 2

*Ya:mkale bokotiyapo malamale mate sadle mate ha:ha:iya*

<sup>1</sup> Wua: Keliso dulu dla ha:ha:lati itiyamale hamdi? Epame ya:ta bokotiyapo malamaleta wua:ye gademdi? Epo dulu edla wua: Soko mate hatlope demdi? Epame wua: dulu dla ya:mkale polowamale mate gadlowe koko mate elema:?

<sup>2</sup> Wua: dulu dla ipapele kokota dollupiye, na: wua: dla atlema, malamale hatlope depame bokotiyapo malamale dulu dla ha:ha:mama hatlope depo ha:ha:iya. Wua:ta ipapele koko dulu dla ha:ha:lepiye, eta na: dla siyele pato hamilipe. <sup>3</sup> Epo ha:ha:le dulu dla wua: wa:skamu wua: hi di dla halopo hetamama ya:mkale malamale pa:le mate ha:ha:miya. Amasiyama wua: sadle mate ha:ha:mama yimkadulo sikemte momalamha:ha:iya. <sup>4</sup> Epame wua: hatlo wua:ta solotamale koko tlo ala:mha:ha:miya. Amasiyama wua: amkadulota solotamale koko mape ala:mha:ha:iya.

### *Keliso koko natipo dolumaiya*

<sup>5</sup> Wua:ta ha:ha:le dulu dla wua:ta momalamale mate epo wua:ta moto mate koko halë mate Keliso some ipo ha:ha:iya.

<sup>6</sup> Koko hapuloma dulu dla Kelisoye God depo haluwapo.

Amasiyama ya:ta epo God depo haluwa kokoye pase sikemte malamana.

<sup>7</sup> Amasiyama ya: ya:ta epo halale koko hapulomaye God hala dla me-pomelepame ya:skamu ya:ye koko pa:le duwapo.

Epame ya:ye oplami moto hapame ta:lamo dla puwapo.

Ya:tapo salladlalo oplami halemama salladle oko halowedeme maluwapo.

<sup>8</sup> Ya: epo oplami moto hapo ya:skamu isili dla hamtulupame

God yu dla salladepo sela:mama dali yekelemhimili di dla poloweje po-alina.

<sup>9</sup> Epedeme Godta ya:ye di ikadepe dla hamheta-pame ya: wadle hi pato hamiwapo.

Hi itapo hi hapuloma dulu dla di ikadepe dla elapo.

<sup>10</sup> Godtapo Yesu wadle hi pato iye hamiwapo,

Pepele di dla ha:ha: so hapuloma mate epo ta:lamo dla ha:ha: so hapuloma mate epame ta:la dulu dla ha:ha: so hapuloma mateta hatlo Yesu ya: hi dla heodlepo depame.

<sup>11</sup> Epapedeme hapulomatapo di A God hiye di dla ta:dlowedeme Yesu Kelisoye Lod dlepe.

*Wua: God ya: akimlala depo ha:ha:mama tamili some amtuwale dulu dla salempopa:iya*

<sup>12</sup> Epapedeme namkadulo, na:ta wua: mate haluwa oloma edla wua:ta na: yu dla ka:pi salladepo siyamuwapo. Amasiyama ka:dena, ma na:ta wua: saliyome tame pateka:mu dla hala oloma hema wua:tapo na: yu dla woloma mepo salladepo siyamaiya. Epele dulu dla wua: God wowota:le mate ha:ha:mama mikadepe dle sota ha:ha:lalo pasakalo nati-ya. <sup>13</sup> Adipalati, Godtapo wua: dulu dla oko hamhalemama wua: wadle ya:ta solotamale koko ka:ka:dle halomolowe malamal-eye halopimdepo.

<sup>14</sup> Wua: koko hapuloma halomha:ha:mama alli mate yu topulolle mate halomha:ha:miya.

<sup>15</sup> Adipalati, wua:ta epapele koko pahalomalalo ha:ha:lepiye, eta wua:ye God ya: akimlala depame ullu pa:le ikadepe ka:ka:dle so dlepe. Epame dulu edla wua:tapo ta:lamo hema ha:ha:mama batalimale so dulu dla tamili some salempopa:lepe. <sup>16</sup> Adipalati, wua:tapo opa opi watle pasakalo yuye alemha:ha:le koko tle. Wua:ta epamha:ha:lepiye, eta na: malamelepe, na: oko wua: dulu dla hauwaye koko pa:le pe-elasema. Epammama Yesuta ma ilampulupiye, na: wua: koko dla siyelowepo.

<sup>17</sup> Wua:ta mikadepe dleye alinepi poyupo God dla hapimdiye epapele some halapo. Epapedeme e tama di tle opata na: yumpo na: omaliye simelepiye, ka:dena. Adipalati, epapele koko dla na:tapo ka:dena demama wua: mate hatlo siyepo. <sup>18</sup> Epedeme wua: mape koko hema na: mate sisiyelowe ka:pi.

*Timoti mate Epaplotitos mate yia: koko*

<sup>19</sup> Namkadulo, Lod Yesu Kelisota ka:dena dlepiye, eta Timotiye wua: dla tane dlowepo. Epame ya:ta wua:ta ha:ha: koko natipame ma ilampuame na: watle atlati dallowe sikemte solotama. <sup>20</sup> Epele dulu dla na: dla wua: gadlowe oplami hale hawa ikadepe, hatlo Timotipo. Hatlo ya:tapo wua: gadloweye sikemte solotama. <sup>21</sup> Amasiyama opa opiye yiskamu yia: koko tlo sikemte malamama Keliso oko tlo pase malamasema. <sup>22</sup> Epele dulu dla wua: Timotita halale kokoye mo-wua:malamana. Ya:tapo maseyemalata ya: a gademdiye epammama ya:tapo na:ta ka:dle yuye opa dla hamsela:lati



na: gademsela:uwapo. <sup>23</sup> Epapedeme na:ta na: dla koko woyamolowe malastlepiye, eta wua: watle Timotiye hapele tane dlowepo. <sup>24</sup> Epame na: Lod dla mikadepe dema, ya:ta na: dla alila hamilipiye, eta na: mape hapele tame wua: natilipe.

<sup>25</sup> Amasiyama namkale Keliso dulu dla na: mate oko halalo oplami Epaploditos mape wua: dla tane dlowama. Wua:tapo ya:ye na: mate sela:mama na: gademsela:lepo depame tane duwapo. Amasiyama na: wata ya:ye ma ilame wua: hala dla tane dema. <sup>26</sup> Adipalati, ya:ye wua: sikemte momalamhalema. Epame wua:ta ya:ta esiyele koko dalepo ya: momalamha:ha: dla ya:ye sikemte dupa yuli mate halema. <sup>27</sup> Yao, eye ikadepe, ya: esiyemama mo-pola yakomuwapo. Epapele tope Godta ya: bokotiyapo malamama ya:ye ma-ka:duwapo. Epame ya:ta ka:dle koko tle Godta na: ma gaduwa, na:ta ya: yilo dupa kollala depame. <sup>28</sup> Epapele koko tle na:tapo ya:ye hapele wua: dla tane dema, wua:ta ya: natipo sisiyelepo depame. Epalati asiyama na:tapo wua: yilo woloma hedle halowepo. <sup>29</sup> Wua:ta ya:ta pula natipame sisiyele mate ya: hamaiya. Wua: opa Epaploditos epapele so dla siyele ta:demha:ha:iya. <sup>30</sup> Adipalati, ya:tapo Keliso oko hamsela:mama mo-pola yakomuwapo. Wua:tapo mo pateka:mu dla ha:ha:mama na: pogadlalo ha:ha:lali ya:tapo wua: yilo na: gademsela:mama ya:skamu ya: pasakaloye haodlowe dla himiwapo.

### 3

*Keliso koko malamolowe tlo pta koko pato*

<sup>1</sup> Epapedeme namkadulo, wua: Lod dulu dla ha:ha:mama sisiyele mate ha:ha:iya. Na: na:ta wua: watle ma atlamuwa koko iye ma wata wua: watle atlamolowedeme po-alisema. Adipalati, ka:dlepo, wua:tapo koko iye woloma sikemte malastepo ha:ha:loweye.

<sup>2</sup> Epapedeme wua: wolomape. Adipalati, opa opitapo wua:ye ipo imsiyamapo, “Wua: pasakalo hallowe halowedeme kapala kotimaiya,” demsiyamapo. Epapele tlope yia:ta imale koko dla mikadepe demiya. Adipalati, yia:ye esemala some batalimale koko halomsiyamama apopo. <sup>3</sup> Epame God mila:pi tle yia:ye kapala pokotimale so depo ha:ha:po. Amasiyama Hela:dle Sokota itiyamale tle God hi di dla ta:dlalo so dia:ye ya: mila:pi tle ikadepe kapala kotimale so depo ha:ha:po. Di dita itiyamale tle koko halomde dla diskamu popepeyalimasema. Amasiyama Kelisota dia: dla koko halë tlo di dla hamhetamama ya:ye pepema.

<sup>4</sup> Epele dulu dla oplami haletapo ya:skamu pepemolowe poka:dena. Amasiyama ya:ta ya:skamu pepemama ya:ye di dla hamhetlepiye, na:ta ya:ye tla:mtelepe. <sup>5</sup> Adipalati, na: waita na: hampame alila 7 pololepo gudlati 8 alila dla na: kapala kestauwapo. Na:ye Isalael so dulu dla Benyamin elele halë oplamipo. Epapedeme na:ye Hibulu oplami ikadepepo. Epo na:ye Pa:lisi oplami halemama Godta aiyalma hatitimale hapulomaye woloma dolumpumama hale pohamastana. <sup>6</sup> Na:ta ikadepe Yu oplami depame Godta aiyalma hatitimale hapuloma eye woloma kikitilata hamame dolumpumama mikadepe dle soye wotiyalle hapimhaluwapo. Epele dulu

dla aiyalma koko hapuloma dulu tle opata na: natiwaye, na:ye batalimale pa:le oplami depo haluwapo.

<sup>7</sup> Alila oloma edla na:ta koko e tlamduwaye koko pta pato demduwapo. Amasiyama watapo Keliso dulu tle halemama takala koko e tlamaye, na: dla pokoko desema. <sup>8</sup> Epapedeme na:ta Yesu Kelisoye na: Lod duwa kokota pato halemama koko opi hapulomaye na: dla koko pa:le halapo. Epedeme na: Keliso hamolowedeme ya: yilo takala koko hapuloma eye pokoko depame hakaka some mo-pololuwapo. <sup>9</sup> Na: Keliso mate hatlope depo hallowe tlo sikemte solotama. Epele dulu dla na:ta di Yu so aiyalma dolumhaluwatapo na:ye God mila:pi tle ullu pa:le oplami pe-epapena, hao. Amasiyama na:ta Keliso dla mikadepe duwa koko tle Godtapo na:ye ullu pa:le oplami duwapo. <sup>10</sup> Epedeme na: Keliso koko mate epo ya:ye powale tle ma pasakalo dla ta:duwa itiyamale koko mate tlo sikemte malamolowe solotama. Epammama na: solotama, Kelisota wotiyalle hapo pouwaye na: ma epapolowedeme. <sup>11</sup> Epame na: ma mikadepe dema, na:ta powale tle ma pasakalo dloweye.

*God tle asiyama halowedeme itiyamale mate mosukulu dla ullumtaiya*

<sup>12</sup> Na:ta atla dulu hema na:ye Keliso kokoye ikadepe sikemte malastauwa depo po-atlasema. Epame na: dla Godta ya: oko hamhalaye ala pogudesema. Amasiyama na: Keliso some halowedeme ya:ta na: sisilamuwa koko dla ala om-tamama itiyamale mate tapo. Adipalati, Kelisotapo na:ta ya: some hallepo depame na:ye

ma-sauwapo. <sup>13</sup> Namkadulo, epapele tlope na: ala Keliso some pohalasema. Epapedeme na: alo koko hapulomaye wowelipame itapu koko tlo sikemte solotamama malatapo. Adipalati, koko iye patopo. <sup>14</sup> Epedeme na: itiyamale mate asiyama halowedeme mosukulu dla tama. Asiyama eye Godta Yesu tle dinapele Pepele di dla ela pasakalo e halowedeme. <sup>15</sup> Epapedeme di mikadepe dle dulu dla kokalepo ha:ha:lalo sota ipo malamha:ha:lowe ka:pipo. Epapele dulu dla wua: koko hema pase mikadepe dlalo wekelepiye, Godta wua:ye woloma imelepe. <sup>16</sup> Amasiyama ka:dlepo, dita adipo ka:dle yuye dolumpuwa, ma mepo dolumtlowe ka:pi.

<sup>17</sup> Namkadulo, ka:dena, wua:tapo na:ta haluwa pasakalo natipame dolumoloweye. Epame mikadepe dle so opa opita di koko natipo dolumha:ha:ye, wua: ma ewolo pasakalo natipame yia: dolumaiya. <sup>18</sup> Adipalati, opa opitapo Kelisota dali di dla powale kokoye allimama ya: dla opahale demha:ha:po. Epedeme na: koko hapuloma iye wua: watle ma-atlamuwapo. Epame ma watapo kaiyo mate wua: watle atlema. <sup>19</sup> Adipalati, opa iwolota tamalaye Dlapa mo dla tamalapo. Epame yia: godye yia: motota solotamale alisisipo. Epame yia:ta batalimale koko halomde dla wowota:lowe tlope ma ka:ka:dle koko depame sisiyemdepo. Epame yia:ta malamale dulu dla ta:lamo koko tlo solotamale pato hutiyepo. <sup>20</sup> Amasiyama dia:ye, Pepele dimoye di mo ikadepepo. Epedeme di, di Lod Yesu Kelisota Pepele dimo tle mallepo depame ya: omha:ha:po. Adipalati, ya:tapo di

pasakaloye hampulupe. <sup>21</sup> Epele dulu dla ya:tapo malame di ta:lamo motoye ya:ta itiyamaleta meyelope depame ma ya: Pepele dimo moto sepeleye di watle hapilipe. Ya:ta di moto amko hapilowe itiyamale etapo alisisi hapulomaye ma ya: hete sitali dla hatitimoloweye ala:na.

## 4

*Mikadepe dle sota halomha:ha:loweye Polota molo atlale*

<sup>1</sup> Namkadulo, na: wua: sikemte malamama wua: tame natilowe solotama. Epame wua:ta na: dla siyele pato hamima. Epedeme wua: Lod dulu dla ha:ha:mama woloma kokalepo ha:ha:iya.

<sup>2</sup> Na: ma wola: dapiyamte Yuwodiya mate Suntu:ka: mate dla atlema, yia:ta yu topulolle dulu dla ha:ha:ye memelepame ma Lod dulu dla hatlope depo ha:ha:lepo depame. <sup>3</sup> Epedeme namkale pato, na: wa: dla atlema, wola: dapiyamte iwoloye woloma gadene. Adipalati, yia:tapo Kelemen mate epo opa opi mate na:ta ka:dle yu hame sela:liti na: gademsiyamuwapo. Epame iwolo hiye Pasakalo Buka dulu dla hutiyepo.

<sup>4</sup> Epapedeme Lod dulu dla sisiyele mate ha:ha:iya. Epame na: yu i mamisika: atlema, wua: sisiyele mate ha:ha:iya. <sup>5</sup> Epame opa hapuloma dla wua:ta sadle kokoye nati-ya. Lodta puluweye mo-mateka:pi. <sup>6</sup> Epapele dulu dla wua: ase sikemte momalamale mate ha:ha:miya. Amasiyama inoma sumale yu mate siyele yu mate wua:ta solotamale koko hapulomaye God dla otele himme ha:ha:iya. <sup>7</sup> Epalati Godta sadletapo wua: dupa dulu dla epo wua:ta malamale dla

omhallepe, wua:ta Yesu Keliso dulu dla me-ha:ha:lepo depame. Adipalati, Godta sadle iye pta ka:pi, opata malamaleyе tla:mtana.

<sup>8</sup> Epedeme mikadepe dle so namkadulo, na:yu mosukulu dla tamama koko iye wua: watle atlema. Wua:ta malamale dulu dla ipapele koko tlo sikemte malamha:ha:iya. Eye ikadepe kokopo, epo sadepo hallowe kokopo, epo God mila:pi tle ka:depo hallowe kokopo, epame ullu pa:po hallowe kokopo, epame opa dla siyele hamilowe kokopo. Epedeme ipapele koko tlo sikemte momalamha:ha:iya. <sup>9</sup> Epapedeme ka:dle koko na:ta wua: watle imalati wua:ta dalepame hauwaye etlo dolumha:ha:iya. Epame wua:ta na:ta koko halomsela:lati natiwaye e ma halomha:ha:iya. Epapelepiye, sadle hamilalo Godta wua: mate hallepe.

*Polota Pilipi sota namkale dle alisisi hamili koko dla siyele yu atlale*

<sup>10</sup> Epapedeme wua:tapo alila pato mo-pokadlati wua:ta ma na: malapame namkale dle alisisi na: watle hamiwa dla na:ta sikemte siyele yu Lod dla atlema. Na:malamana, wua:tapo alila hapuloma dulu dla na: malamha:ha:mduwaye. Amasiyama alila ka:dleta wua: dla popumdena, wua:ta na: malapame na: dla namkale dle alisisi hapiloweye. <sup>11</sup> Epedeme na: dla alisisita pa:lati wua: watle alisisi otomama po-atlasema. Amasiyama na: na:malamana, na:ta adipapele koko dulu dla tulumе hallepiye, na: edla alimama pobatalimana desemde. <sup>12</sup> Adipalati, na: alisisi dimi halloweye na:malamana. Epame na: alisisi pasatale hallowe koko mape na:malamana. Epapele dulu dla na:

dla alisisi pasatale hallowe koko mate epo alisisi dimi hallowe koko mate dulu edla na: ma-ala:na. Epame na: dla daya ta:lowe koko mate epo daya sukallowe koko mate dulu dla na: ma-ala:na. Adipalati, na: ipapele koko hapuloma dulu dla halloweye mo-malastauwapo. <sup>13</sup> Epapedeme na: Kelisota itiyamale hamiwa tle koko hapuloma halomoloweye ma-ala:na.

<sup>14</sup> Amasiyama dulu edla wua:tapo na:ta kokalle koko dulu dla hallati gaduwaye ka:pi. <sup>15</sup> Epedeme Pilipi so mo-wua:malamana, na:ta ka:yapa ka:dle yuye wua: dla hampuame Makedoniya dla hamsela:po depame ma mo hale dla tlowedeme hallati wua:tapo na:ye alisisi mate gaduwapo. Epele dulu dla sos opita na:ye pogadena. <sup>16</sup> Alila opi dulu dla na: Tesalonika dla halemama alisisi dimi hallati wua:tapo alisisi mate na:ye gademduwapo. <sup>17</sup> Epapele dulu dla na:tapo wua: watle alisisi otomhallati po-apesemde. Amasiyama na: solotama, wua:tapo hamili tle asiyama Godta wua: dla gadle himhala natilipo depo amma. <sup>18</sup> Watapo na: dla alisisi sikemte pasatepo elapo. Adipalati, Epaploditosta wua:ta na: watle namkale dle alisisi hapiliye puame hapiwa. Epapedeme wua:ta na: watle namkale dle alisisi hamiliye di Yu sota ka:dle ullu pamalalo ha:lati Godta seyamale ullu papame siyemama ka:dena demdiye, epapele some halapo. Epedeme Godtapo wua: dla ka:dena depame siyemhalapo. <sup>19</sup> Epapedeme na: God dla koko hapulomata pasatame sukulu pa:le elapo. Epedeme ya:ta Yesu Keliso tle wua:ta solotamale kokoye wua: watle hapilipe.

<sup>20</sup> Epapedeme siyele kokotapo di A God dla kokó

elepo ellepe. Eye ikadepepo.

<sup>21</sup> Epapedeme Yesu Keliso dla mikadepe dle so opa hapuloma dla namkale dle yu atlamaiya. Mikadepe dle so na: mate hema ha:ha: so ma yia:ta namkale dle yu wua: dla atlema. <sup>22</sup> Epalati Sisa aya dla oko halalo mikadepe dle so yia:ta namkale dle yuye wua: dla atlema. Epame mikadepe dle so opi mape yia:ta namkale dle yuye wua: dla atlema.

<sup>23</sup> Lod Yesu Kelisota bokotiyapo malamaletapo wua: mate hallepe.



**Ka:dle Yu**  
**Genesis, Exodus, Jonah, and the New Testament in the**  
**Kamula language of Papua New Guinea**  
**Buk Stat, Kisim Bek, Jona, na Nupela Testamen long**  
**tokples Kamula long Niugini**

Copyright © 2005 The Bible Society of Papua New Guinea

Language: Kamula

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 22 Feb 2024 from source files dated 31 Aug 2023

74ad7974-9dcd-5470-9c22-0eda5fbabe15